

ጳውሎስ ቆርንቶሴ አሳሰ ፃፊዳ ናምዓንሉ ኪታ ጊዶ ቆፋ

ጳውሎስ ቆርንቶሴ አሳሰ ናምዓንሉ ኪታ ፃፊዳ ጋሶይ ቆርንቶሴን ዲዛ ዋሳ ኬላይራ ኢዛሰ ዲዛ ጋይቶቲላይ ዳር ሎዎንታ ዋዴ። ኢሲ ኢሲ አማኒዛ አሳቲ ዳዲዛ ካጼ ቃላታ ኢዛ ቦላ ሺሺኮካ ጳውሎስ ኢሰታራ ጊጋናሰ ዳር ኮዩዳይሳ ቤሴሰ። ኢዚ ኢሰታራ ጊጊኮ ኢዛሰ ጊታ ኡፋይሲ ሲዬታናይሳ ቆንጨሴሰ።

ባ ፃፊዳ ኮይሮ ኪታ ቦላ ጳውሎስ ቆርንቶሴን ዲዛ ዋሳ ኬላይራ ኢዛሰ ዲዛ ጋይቶቲላ ቆንጨሴላን ሄ ዋሳ ኬላይን ዴንዲዳ ቦሮ የዎዛሲኔ ኢሰታ ኤቁቲላሰ ኣይሰ ኢዚ ሚኖ ዛሮ ኢሚዳኮኔ ኤሪሴሰ። ኢዚ ሄሳራ ኢሲ ቦላ ጋሊዲ ሄ ኢዛ ሃንቆዛን አሳይ ማርቲላሲኔ ማቃይኖሰ ጋሊዳ ጊሽ ሄሲ ኢዛሰ ሲዬቲዳ ኡፋይሳ ቆንጨሴሰ። ቃሴካ የሁዳን ዲዛ አማኒዛ አሳ ማዳናሰ ኪያቲላ ማዶ ኢማና ማላ ኢሰታ ቆፊሴሰ። ወርሴላ ሽምፖታ ቦላ ጳውሎስ ባ ሃዋሬቲላ ቦላ ዴንዲዳ ዋቶዛ ጊሽ ቤና ማዲዛ ማካልካያ ዛሮ ኢሜሰ። ቆርንቶሴ ዋሳ ኬላን ኢሲ ኢሲ አሳቲ ባርካ ባና ቲሙ ሃዋሬቲ ኑና ጉሳን ጳውሎስ ኢዚ ዋርዶ ሃዋሬ ጊዲ ሞቲቲሰ።

ሃ ማፃፋይ ኦይኪዳ ኩሜላ ቆፋ
ጌሎሶ 1:1-11
ጳውሎሳኔ ቆርንቶሴ ዋሳ ኬላ 1:12-7:16
የሁዳን ዲዛ አማኒዛ አሳ ማዳናሰ ሚሼ ኬሶ 8:1-9:15
ጳውሎስ ባሲ ሃዋሬቲላ ጊሽ ሺሺዳ ማካልካያ ዛሮ 10:1-13:10
ኩሻ ቆፋ 13:11-14

1 ያሳ ሼኔ ማላ ዩሱሰ ኪርሰቶሳሰ ኪቲቲዳ ጳውሎሳፔኔ ኑ አሻ ዲምቶሳፔ ቆርንቶሴን ዲዛ ያሳ ዋሳ ኬሴይሰ ቃሴካ ኣካያ ቢታን አማኒዛ ኩሜላ አሳሰ። *

2 ኑ ኣዋ ያሳፊኔ ጎዳ ዩሱሰ ኪርሰቶሳፔ ኪያቲላኔ ሳርይ ኢንቲሰ ጊዶ።

* 1:1 ሃዋ 18:1

ጳውሎሲ ያሳሰ ሺሺዳ ጋላታ

3 ማሪዛ አዋሲኔ ወርሲካ ሚንጮሊዛ ኑ ጎዳ ዩሱስ ኪርሰቶሳ አዋ ያሳሰ ጋላታይ ጊደ። 4 ኑካ ኑ ባጋራ ያሳፌ ደሚዳ ሚኖቴላን ሜቶቴዛይታ ሚንጮላናሰ ዳንዲያና ማላ ኑ ሜቶን ኢዚ ኑና ሚንጮሌስ። 5 ኪርሰቶሳ ዋይይ ኑ ቦላ ዳሪዳይሳ ማላ ኑሰካ ኪርሰቶሳ ባጋራ ሚንጮላይ ዳሪሰ። 6 ኑ ሜቶን አንቴ አቶቴሌኔ ሚኖቴሌ ደሚታ። ኑኒ ሜቶቴሺን ቃሴ አንቴካ ካሴ ኤኪዳ ሜቶዛ ማላ ጌንጩ ኤኪዳ ሚኔታንዳታ። 7 ኑ ሜቶ አንቴ ኑናራ ሻኪ ኤኪዳ ማላ ኑናራካ አንቴ ሚኔታናይሳ ኑኒ ኤሪዛ ጊሽ ኑስ አንቴ ቦላ ዲዛ ኡፋይሲ ጊታ።

8 ታ አሻቶ! ኢሲያ ቢታን ኑ ቦላ ጋኪዳ ሜቶ ጊሽ አንቴ ኤራና ማላ ኑ ኮኖስ። ሄ ኑ ቦላ ጋኪዳ ሜቶዚ ኑ ቶካናፔ ዴዎ ጊዲዳ ጊሽ ሃይቆንታ ፓፃ ዳና ጊዲ ቆፐቤኮ። * 9 አዳፊካ ኑ ቦላ ሃይቆ ፐርዳይ ፐርዴቲዳ ሚሳቴዴሰ፤ ሄሲ ወሪካ ኑ ቦላ ጋኪዳ ጋሶይ ኑኒ ሃይቆዳይታ ዴንጲዛ ያሳን አማኔታናሳፌ አቲን ኑ ዋልቃን አማኔቶንታ ማላ ሃኒዴሰ። 10 ኢዚ ኑና ሄሳ ማላ ቆፖንታ ሃይቆፔ አሺዴሰ። ሃዒካ ዋዴፐካ ኢዚ ኑና አሻናይሳ ኑ አማኔቶስ። 11 አንቴካ አንቴ ዋሳን ኑና ማዲቴ። ዳር አሳ ዋሳን ኑስ አማቴዳ አዎታሲኔ ኑ ጊሽ ዳሮቲ ያሳ ጋላቴቴሰ።

ጳውሎሲ ቤያና ባና ጊዳ ቆፋ ላሚዴሰ

12 ሂሰቲኮ ኑ ጨቁቴሌ ሃይሳ ማላ። ሃ አላማዛን ሃራፐካ አንቴሳራ ኑሳራ ዲዛ ጋይቶቴላን ያሳፌ ጊዲዳ ጌሻቴላኒኔ ሱሪቴላን ኑ ዴዒዳይሳ ኑ ዋዘናይ ኑስ ማርካቴስ። ሄሲካ አሳ ጨንጫቴላን ጊደንታ ያሳ ኪያቴላና። 13 አንቴ ናባቢዲ ኤራናሰ ዳንዳኖንታ ሚሽ ኑ አንቴሰ ፃፎኮ። አንቴ ወርሲካ ናባቢዲ ኤራናይሳ ኑ ኤሮስ። 14 አንቴ ኑናን ጨቁቴዛይሳ ማላ ኑካ አንቴናን ጨቁቴዛይሳ ሃዒ ወርሲ ኤሮንታ ኣኪኮካ ጎዳ ዩሱሲ ሲሚ ዪዛ ጋላሰ ወርሲካ ኤራና።

15 ታኒ ሃይሳ ሻካ ኤሪዛ ጊሽ ናምዑቶ አንቴ ጎዴታና ማላ ኮይሮ አንቴና ቤያና ቆፓዲሰ። 16 ሄሲካ ታ ካሴ ማቂደኒያ ባሾ አንቴና ቤያዳ ማቂደኒያፐካ ሲማሼ አንቴ አቻራ አቆዳ ታ ዩሁዳ ቢሺን አንቴ ታና ማዳና ማላ ቆፓዲሲኮሺን። 17 ሃይሲ ታ ቆፋይ አንቴሰ ታ ሎዒላ ቆፖንታ ቆፋ ሚሳቴዜ? ዋይኮ ኣይዛቤታሰ ደሴ ጊዲዳይሳሶ ታካ ኢሲቶ “ኤሮ ኤሮ ቃሴካ ኣካይ ኣካይ” ጊዛ ሚሳቴዜ? 18 ያሲ አማኔቲዳ ያሴ ጊዲዳ ማላ ኑ አንቴሰ

* 1:8 1ቆር 15:32

ዮቲዛ ቃላይካ “ኤ” ገዲ “አካይ” ገዛዝ ገደና። 19 ጋሶይካ ታና ገዲን ወይኮ ሲለዋናሴኔ ደምቶሳ ገዲን ኑ አንቴሰ ሳባሲዳ ያሳ ና ዬሱስ ኪርሰቶሲ “ኤኔ አካይ” ገደና። ገደ ኣቲን ኡባ ዋዳ ኢዛን “ኤ” ፃላላይ ዴሰ።

20 ያሳፌ ኢማቲዳ ሂደታቲ ወሪካ “ኤ” ገዲዳይ ኢዛና። ኑካ ኢዛ ባጋራ ያሳ ቦንቸሰ “አሚን” ገዛይ ሄሳ ገሻሳ። 21 ሄሳ ገሽ አንቴካ ኑኒካ ኪርሰቶሳን ሚኒ ኤቃና ማላኔ ባ ኦሶስ ዶሪዳይ ያሳ። 22 ኑ ኢዛይታ ገዲዳይሳ ኤሪሳናሰ ባ ማታሜ ኑ ቦላ ሾጩዳይኔ ኑ ሲንላፌ ዴማና ሚሻሰ አያና ዋሴቴላ ኑ ዋዝናን ዋሊዳይ ኢዛ።

23 ታኒ ቆርንቶሴ ሲማዳ አንቴኮ ቦንታ ኣገዳይ አንቴና ሚሺሲኬ ጋዳኮ፤ ቃሴ ሄሲ ቱሙ ገደንታ ዋርዶ ገዲኮ ያሲ ታ ቦላ ማርካቶ። 24 አንቴ ኣማኖን ኤቁዳ ገሽ አንቴና ኡፋይሳናሰ ኑ አንቴናራ ኦላና ኣቲን አንቴ ኣማኖ ቦላ ጎዳታናሰ ገደና።

2

1 ታ አንቴና ሚሺሳናሰ ኮዮንታ ገሽ ቃሴካ አንቴኮ ቢኬ ጋዳ ቆፋ ቃቻዲሰ። 2 ታ አንቴና ሚሺሲዳዝ ገዲኮካ ሚሹቲዳ አንቴፌ ኣጂ ኡፋይሰዛይ ታሰ ሃራይ ኦኒ ዲዜ? 3 ታ ካሴ አንቴሰ ፃፊዳይ ታ አንቴኮ ቢዛ ዋዳ ታና ኡፋይሳናሰ ቤሲዛ ኣሳቲ ታና ሚሺሶፔቶ ጋዳ ያፋዲሰ። ጋሶይካ ታ ኡፋይቲኮ አንቴሰ ኡባሰካ ኡፋይሰ ገደናይሳ ታ ኣማናይሰ። 4 ታ አንቴሰ ሄሳላ ያፊሺን ታ ዋዝናን ዳር ሚሻይኔ ዳር ቆፋይ ኩሚ ዲሺን ዳር ኣፋንፃሼ ያፋዲሰ። ሄሳካ ታ ኦሊዳይ ታ አንቴና ዳር ሲቁዛይሳ አንቴ ኤራና ማላ ጋዳ ኣቲን አንቴና ሚሺሳናሰ ገደና።

ቆሂዳዴሰ ኣቶ ጉሰ

5 ኦኒካ ኣሴ ቆሂዳ ገዲኮ ጉጃቾ ገደንታ ማላ ሄ ቆሂዳዴይ ታና ያላላ ገደንታ ጉላራ ገዲኮካ አንቴናካ ወርሲ ቆሂዳሰ። 6 ሄሳ ማላ ኣሳሰ ዳር ኣሳይ ኢዛ ቦላ ዋሊዳ ቁፃቴይ ኢዛዴሰ ገደና። 7 ሄ ኣዴይ ከሂ ሙዘቲዲ ሂደታ ቃንፆንታ ማላ አንቴ ሄሳዴሰ ኣቶ ኢዛ ገዲ ሚንሌላናሰ ቤሴሰ። 8 ሄሳላካ አንቴ ኢዛ ሲቁዛይሳ ዛሬሊዲ ኢዛ ቤሳና ማላ ታ አንቴና ዋሳይሰ። 9 ታ ሃይሳ አንቴሰ ያፊዳይ አንቴ አንቴና ጋኪዛ ፓጩ ያኒዲ ኡባን አንቴ ኣዛዜቲዛኮኔ ኤራናሳ። 10 አንቴ ኣቶ ገዛዴሰ ታካ ኣቶ ጋይሰ። ቃሴ ታ ቱማፔ ኣቶ ጋናዚ ዲዛ ገዲኮ ኪርሰቶሳ ሲንላን ታ ኣቶ ገዛይ አንቴ ገሽ ጋዳ። 11 ታ ሄሳላ ኦሊዳይ ያላዔይ ጌሊዛ ያዔ ዴምንታ ማላ ጋዳኮ! ኑ ኢዛ ጌኔ ቆፋ ባሎኮ።

12 ታኒ ከርሰቶሳ ሚሺራቾ ቃላ የታናሰ ዓርዳዳ ቢዳ ዎዴ ጎዳይ ታሰ ኦሶ ኦጌ ደዪዳሰ። 13 ጊዶ ኣቲን ታኒ ታ ኣሻ ቲቶሳ ሄን ዴሞንታ ኣጊዳ ጊሽ ታ ዎዘናይ ሼሞፖንታ ኣዲዳ ጊሽ ኢሰቲ ታና ሄፔ ሞይዘን ማቁደኒያ ዴሬ ባዲሰ።

14 ጊዶ ኣቲን ከርሰቶሳ ባጋራ ኡባ ዎዴ ኦና ያኖ ኦጌን ካሌሌ ዩሺዛኔ ባ ሎዎ ኤራቴላ ኦ ባጋራ ኡባ ሶን ቆንጨሲዛ ጎዳሰ ጋላታይ ጋኮ። 15 ጋሶይካ ኦኒ ቆያናይታሲኔ ኣታናይታሰ ጊዶን ከርሰቶሳ ባጋራ ያሳሰ ሺቁዳ ሳዎ ቱኑ ጊዛ ኤፃኔ ማላ።

16 ቆያናይታሰ ኦኒ ዎቂዛ ዪንቆ። ኣታናይታሰ ቃሴ ሃይቆፔ ጌዴ ዴዎሶ ኤፊዛ ዴዎ ሳዎ። ሂሰቲን ሃይሳሰ ቤሲዛዴይ ኦኔ? 17 ኦኒ ዎቂ ዴማናሰ ጊዲ ያሳ ቃላ ሻቃጫ ማላ ዋላኬሬሊዲ ባይዚዛ ዳሮ ኣሳታ ማላ ጊዶኮ። ጊዶ ኣቲን ያሳፊ ከቲቲዳ ሱሬ ኣሳ ማላ ጊዲዲ ከርሰቶሳን ያሳ ሲንሳን ሱሬ ዮቶሰ።

3

ኦራላ ጫቆ ኦሳንቻታ

1 ኦኒ ሃዒ ኦርካ ኦና ዛሪዲ ጋላቲኖ? ዎይኮ ሃራ ኣሳታ ማላ ኣንቴሰ ጊዲን ዎይኮ ኣንቴሬ ሃ ኦሰ ፃፊቲዳ ጋላታ ዲብዳቤ ኮሽዚሻ? 2 ኣንቴ ቃሴ ኣሲ ዉሪ ኤሪዛይኔ ናባቤቲዛ ኦ ዎዘና ጋርሳን ፃፊቲዳ ዲብዳቤታ። 3 ኣንቴ ቃላሜን ፃፊቲዳይታ ጊዶንታ ዴዎ ያሳ ኣያናን ፃፊቲዳይታ፤ ቃሴካ ሹቻ ቦላ ዎጩቲ ፃፊቲዳይታ ጊዶንታ ኣሳ ዎዘናን ፃፊቲዳይታኔ ኣንቴ ኦናን ጎዔቲዳ ከርሰቶሳሰ ቆንጨዬ ዲብዳቤታ። *

4 ከርሰቶሳ ባጋራ ኦሰ ያሳ ቦላ ዲዛ ኣማኖይ ሄሳ ሚሳቲሰ። 5 ኦና ሄሳሰ ጋሊዳይ ያሳፊ ኣቲን ኦኒ ኦ ዎልቃን ኦሊደሰ ጊዛ ሚሺ ኢሲናካ ባዎ። 6 ሄሲካ ፒዳሌን ፃፊቲዳ ዎጋን ጊዶንታ ኣያናን ፃፊዳ ኦራላ ጫቆ ቃላ ኦሳንቻታ ኦ ጊዳና ማላ ኦሊዳሰ። ጋሶይካ ፒዳሌን ፃፊቲዳ ዎጋይ ዎቂሰ፤ ኣያናይ ጊዲኮ ዴዎ ኣሜሰ። *

7 ሄሳ ጊሽ ኢሰራዔሌ ናይቲ ኢዛ ኣይፊሶን ዲዛ ቦንቾ ጋሶቴሳን ሙሴ ኣይፊሶ ቲሺ ሂሰቲ ዪሎይ ኢሰታ ያናና ጋካናሰ ሄሲ ጉዬፔ ቆያናይሲኔ ሹቻ ቦላ ፒዳሌን ዎጩቲ ፃፊቲዳ ሃይቆ ኦሶሰ ጊዲዳይሲ ቦንቾን ቆንጨዛይሳ ጊዲኮ፤ * 8 ሂሰቲን ኣያና ኦሶሰ ዎኒዲ ሄሳፊ ኣቂዛ ቦንቾይ ዴኔ? 9 ኣሲ ኢዛን ፒርዴቲዛ

* 3:3 ኬሳ 24:12፤ ኤር 31:33፤ ሂዚ 11:19፤ 36:26 * 3:6 ኤር 31:31

* 3:7 ኬሳ 34:29

ኦሶይ ሄሳ ማላ ቦንቹተዛይሳ ገዲኮ ኣሲ ኢዛን ፃሊዛ ኦሶይ ሄሳፌ ኬሂ ኣጲዛ ቦንቹይ ኢዛሰ ዋኒ ዴኔ? 10 ሃይሳፌ ካሴ ቦንቹተዳይሴ ሃራ ኢዛፔ ኣጲዛ ቦንቹይ ዲዛይሳራ ገቢሲሺን ቦንቹይ ባይንዳይሳ ገዲዴሰ። 11 ጳሚ ጳሚ ቢዛይሳሰ ሄሳ ማላ ቦንቹይ ዲኮ ሜርናሰ ሚኒ ኤቁ ዳናይሳሰ ሄሳፌ ኬሂ ኣጲዛ ቦንቹይ ዋኒ ዴኔ?

12 ሄሳ ገሽ ሄሳ ማላ ሂደታይ ኑስ ዲዛ ገሽ ኑኒ ፃላቴላን ሃሳዮሰ። 13 ኢሰራዔሌ ናይቲ ሙሴ ኣይፌሶይ ያሊቁዛይሳ ኣገ ኣገ ቢሺን ኢሰቲ ወርሴላ ቤዮንታ ማላ ኢዚ ባ ኣይፌሶ ጎዚዳ ሙሴ ማላ ገደኮ። * 14 ገደ ኣቲን ካሴ ጋልዓ ጫቆ ቃላይ ናባቤተሺን ሄ ዎዴ ጎሳዚ ሃቕ ጋካናሰ ኪቸንታ ገሽ ኢሰታ ዎዝናይ ደጪዳ ማላ ዴሰ። ሄ ጎሳይ ሃዒካ ኪቸቤና። ኢዚካ ኪቻናይ ኪርሰቶሳን ፃላላ።

15 ሃቕ ጋካናሰካ ሙሴ ማፃፋቲ ናባቤተዛ ዎዴ ሄ ዎዴ ጎሳይ ሃዒካ ኢሰታ ዎዝና ጎዚ ኦይኬሰ። 16 ገደ ኣቲን ኢሳዴይ ጎዳኮ ሲሚዛ ዎዴ ጎሳዚ ቃሬቲ ኪቸሰ። * 17 ጎዳይ ኣያና። ጎዳ ኣያናይ ዲዛሰን ኣይሌቴሐ ዴና። 18 ኑኒካ ጎዳ ቦንቹ ማሰቶቲ ማላ ያልቁቲሼ ኢዛ ሚሳታናሰ ሃ ቦንቹፌ ጌዴ ሃራ ቦንቹን ላሜታና። ሄሲካ ኣያና ገዲዳ ጎዳፔ።

4

ቱሙ ሃዋሬቲላ ኦሶ

1 ያሳ ማርቴላ ዳርፔ ዴንዲዳይሳን ሃይሴ ሃ ኦሶዚ ኑስ ዲዛ ገሽ ኑኒ ሂደታ ቃንዎኮ። 2 ገደ ኣቲን ጌማራ ሃኒዛ ዬላሲዛ ዮዎታ ኑ ኣገደሰ። ኣሰ ባሌሐኮ፤ ያሳ ቃላ ዎርዶራ ዋላኮኮ። ሄሳ ሂሰታናፔ ቱሙ ዮዎታ ቆንጨራ ዮተሼ ኣሲ ወሪካ ኑ ገዛይሳ ኤካና ማላ ኑናቴላ ያሳ ሰንሐ ሺሻሰ። 3 ኑ ሚሺራቕ ቃላይ ጎርዴተኮካ ኢዚ ጎርዴቲዳይ ጳያናይታሳ።

4 ያሳ ለሚሶ ገዲዳ ኪርሰቶሳ ቦንቹ ሚሺራቕ ቃላ ፖዎዛ ሃ ኣላሜ ኣሳይ ቤዮንታ ማላ ሃይሳ ሃ ኣላሜዛ ያሲ ኣማኖንታ ኣሳ ዎዝና ሙሚሲዴሰ። 5 ኑኒ ዬሱሰ ኪርሰቶሲ ጎዳ ገዲዳይሳ ሳባኮሰ ኣቲን ኑና ሳባኮኮ። ኑካ ኑ ባጋራ ዬሱሳ ገሽ ኢንቴሰ ኦሊዛዴንታ ገዲደሰ። 6 ኪርሰቶሳ ሲንላን ያሲ ባ ቦንቹ ኤራቴላ

* 3:13 ኬሳ 34:33 * 3:16 ኬሳ 34:34

ገረ ኑስ ኢማናስ “ገረ ዲ ዲ ማን ገረ” ገዳ ያሲ ባ ገረ ኑ ዋዝናን ገረሲዲዳስ። *

7 ገዳ ኣቲን ሃይሲ ገታ ዋልቃይ ኑስ ያሳፌ ኢማቲዳስ ኣቲን ኑፔ ገዳንታይሳ ቤሳና ማላ ሃይሲ ቦንቾ ሚሻይ ኑናን ኦቶ ሚሳቲዳይታ ገዳን ዳስ። 8 ኣዋ ባጋራካ ኑና ሱጊኮካ ኑኒ ቲንሐ ገ ሜቆኮ። ኑስ ዮሃይ ቲፒ ጊኮካ ሂደታ ቃንዮኮ። 9 ኑ ጎዴቲኮካ ዋራ ዋዲ ኣቶኮ። ኢስቲ ኑና ሾጪ ጊንዴርሲኮካ ኑ ዳዮኮ። 10 ዩሱሳ ዳይይ ኑ ኣሳቲላን ቆንጫና ማላ ኑኒ ኢዛ ሃይቆ ኡባ ዋዴ ቶኪ ዩዮስ። 11 ዩሱሳ ዳይይ ሃይቂዛ ኑ ኣሳቲላን ቆንጫና ማላ ገፃ ዲዛ ኑኒ ኡባ ዋዴካ ዩሱሳ ገሻሽ ሃይቆስ ኣዲ ኢማቶስ 12 ሄሳ ገሽ ኑ ሃይቆስ ኣዲ ኢማቲሺን ኢንቴ ቃስ ዳይን ጋኬታ።

13 ካሴ ገሻ ማፃፋን ፃፊቲዳ ማላ “ታ ኣማኒዳ ገሽ ሃሳያዲስ” ጌቲቲዳይሳ ኑካ ሄሳ ሄ ኣማኖ ኣያናን ኣማኒዛ ገሽ ሃሳዮስ። *

14 ጋሶይካ ጎዳ ዩሱስ ኪርሰቶሳ ሃይቆፔ ዴንላዲይሲ ኑናካ ኢዛራ ኢሲፌ ዴንላዲ ኢንቴናራ ባ ሲንሐ ሺሻናይሳ ኑ ኤርስ።

15 ዳር ኣሳ ጋኪሼ ዲዛ ኪያቴሌ ያሳ ቦንቾስ ጋላታ ቦላ ጋላታ ጉጃና ማላ ሃይሲ ዉሪካ ኢንቴና ጎዳናስ ሃኒዳስ።

16 ሄሳ ገሽ ኑ ሂደታ ቃንዮኮ፤ ኑስ ካራ ባጋ ኣሳቲላይ ዳይ ዳይ ቢኮካ ኑስ ጋላ ባጋ ኣሳቲላይ ጋላስ ጋላስ ኑራዲ ኑራዲ ባሲ። 17 ሄሳስ ሃሲ ጉላ ዋዴስ ኑና ጋኪዛ ዋዩይ ኢዛራ ገጋናስ ዲንዳዮንታ ሚርናስ ገዲዛ ቦንቾን ኑና ጋላና። 18 ሄሳ ገሽ ኑ ቲሺ ሂስቲ ዪሊዳይ ሃሲ ኣይፌን ቤቲዛ ሚሻ ቦላ ገዳንታ ሃሲ ኣይፌን ቤቶንታ ሚሻ ቦላ ዳስ። ሃሲ ቤቲዳይሲ ኢዚ ሃሲስ ፃላላ። ሃሲ ኣይፌን ቤቶንታይስ ገዲኮ ኢዚ ሚርናሳ።

5

ሚርናስ ዳናሶ

1 ኑኒ ኢዛን ቢታ ቦላ ዲዛ ዲንካኔይ ላሌቲኮካ ኣሳ ኩሼን ገዳንታ ያሳ ኩሼን ኦሴቲዳ ሚርና ኬሌ ኑስ ሳሎን ዲዛይሳ ኑ ኤርስ። 2 ሄ ዋዴይ ጋካናስ ኑ ኬላ ሳሎይሳ ማይዳናስ ኑ ላሞቲ ናጎስ። 3 ቱማፔ ሄሳ ኑ ማይዲዳፔ ጉዬ ካሎቶኮ። 4 ኑኒ ሃይሳ ሃ ዲንካኔዛን ዲዛ ዋዴ ኡባን ኢዚ ዳይዛ ገሽ ዳቡራ ፒዲ ጎስ። ሄሳስ ጋሶይካ ሃይቂዳይሲ ዳይን ላሞታና ማላ ኑኒ ሳሎን ዳና ሶዛ ማይዳና ኣቲን ኑፔ ቃሬታና ማላ ኑ ኮዮኮ። 5 ሄሳስ

* 4:6 ሜዲ 1:3 * 4:13 ማዛ 116:10

ኑና ገረሲዳይ ያሳ። ቡሮ ያናይሳስ ዋሴ ገዳና ማላ ኑስ ባ አያና አሚዳይ ኢዛ። 6 ኑኒ አሾን ዲዛ ዋዴ ጎዳፔ ሃኪ ዲዛይሳ ኤሪኮካ ኢዛን አማኔቲዲ ዶስ። 7 ኑኒ ዲዛ ዲሳይ ጎዳን አማኒዲ አቲን አይፊን ቤዖን ገዳና። 8 ኑኒ አሾፔ ሻኬቲዲ ጎዳራ ዲስ ዶራናይሳ ታ ሲዶንታ ዮታይስ። 9 ሄሳ ገሽ ኑ አሾን ዲኮ ዋይኮ አሾፔ ሻኬቲኮካ ኑስ ዋና ቆፋይ ጎዳ ኡፋይሶ። 10 ኑኒ ዉሪካ ኪርሰቶሳ ፐርዳ ዋምቦራ ሲንሊ ሺቃናይሲ አቴና፤ ኑፔ ኢሶይ ኢሶይ ቢታ ቦላ ባ ኦሊዳ ኢታ ገዲን ዋይኮ ሎዖ ገዲን ባ ኦሶ ማላ ቤሲዛ ዋጋ ኤካና።

አሳ ያሳራ ማቃይኒቶ አሶ

11 ሄሳ ገሽ ጎዳስ ባቦ ጉሲ አይ ጉሳኮኔ ኑ ኤሪዛ ገሽ አሳይ ኑ ዮተዛይሳ ኤሮ ገ ኤካና ማላ ኦፋናስ ዳቡሮስ። ኑኒ ኦናንታኮኔ ያሳ አቻን ቆንጩ። ቃሴካ አንቴ ዋዘናንካ ቆንጩ ገዲዳይሳ ታ አማናይስ። 12 ታ ሄሳ ገዛይ ኑና አንቴ ሲንላን ጋላታናስ ገደንታ ዲሺን አንቴ ኑናን ጩቁታና ማላ አቲን ዋዘናፔ ገደንታ አይፊን ቤቲዛ ሚሻን ጩቁቲዛይታስ አንቴ ዛሮ ኢማናስ ዳንዲያና ማላ ጋዳ ጋይስ።

13 ኑ ጎሽ ገዲኮ ያሳ ገሽ ገዲ ጎዴዶስ። ኤራታ ገዲኮካ አንቴስ ገዲኮ! 14 ኪርሰቶሲ ኡባስ ኢሲቶ ሃይቆይሳኔ ሃሪይ ዉሪካ ኢዛራ ኢሲፊ ሃይቁዳይሳ ኑ ኤሪዳ ገሽ ኪርሰቶሳ ሲቆይ ኑና ዋልቃራ ኦሲሴስ። 15 ሺዎፖራ ፓፃ ዲዛይቲ ዉሪካ ሄ ሃይቁዳይሳሲኔ ሃይቆፔ ዴንዲዳይሳስ ዳና ማላፔ አቲን ሃይሳፊ ጉዬ ኢስቲ ባሲ ዶንታ ማላ ኪርሰቶሲ ኡባስ ሃይቁዴስ።

16 ሄሳ ገሽ ሃይሳፊ ጉዬ ኑኒ ኦና አሲካ አሾ አይፊን ያሎኮ። ኑኒ ሃይሳፊ ካሴ ኪርሰቶሳ አሾ አይፊን ያሊዳይ ጮ ማላ አሳ ማላ ያሎ። ገዲኮካ ሃይሳፊ ጉዬ ሲንላስ ገዲኮ ሄሳ ያሎ። 17 ሄሳ ገሽ ኦኒካ ኪርሰቶሳ ባጋ ገዲኮ ኢዚ ኦራሳ ማዴቲፋ። ካሴ ጩጋ ማዴቲፋይ አዲዴስ። ሄ ኢዛ ኪቾሳን ሃራ ኦራሳ ማዴቲፋ ጌሊዴስ። 18 ሄሲ ዉሪ ሃኒዳይ ኢዚ ኑና ባናራ ኪርሰቶሳ ባጋራ ማቃይንሉዲኔ ማቃይንሉ አሶ ኑስ አሚዳ ያሳና። 19 ሄሲካ ያሲ ኪርሰቶሳ ባጋራ ሃንኮ አላሜ አሳ ዉርሲካ ባናራ ማቃይንሉዴስ ጉሳ። ኢስቲ ቆሆዛካ ቆዲቤና። ኑሰካ ኑ አሳ ጎዳራ ማቃይንላና ቃላ አሚዴስ።

20 ያሲ ኑ ባጋራ አስ ያይገዛ ገሽ ኑኒ ቃሴ ኪርሰቶሳ ኦጋላታ። ሄሳ ገሽ “አንቴ ያሳራ ማቃይኒቲ!” ገዲ ኑ አንቴና ኪርሰቶሳ ሱንላን ዋሶስ። 21 ኑኒ ኪርሰቶሳ ባጋራ ያሳ ያሎቴል ገሼቲ

ኤኪዛይታ ጊዳና ማላ ያሲ ኢዛ ቦላ ናጋራይ ባይንዳ ኪርሰቶሲ ኢዚ ኑ ናጋራ ቶካና ማላ ኦሊዳስ።

6

1 ኑኒ ያሳራ ኦሊዛይታ ጊዳዳ ማላ ኢንቴ ኤኪዳ ያሳ ኪያቴላ ጮ ማላ አሾፍቴ ጊሼ ኑ ኢንቴና ዎሶስ። 2 ያሲ “ታኒ ታሰ ጊጊዳ ጋላስ ኔና ሲያዲስ! አቴዛ ጋላስ ታ ኔና ማዳዲስ!” ጊዛ ጊሽ ሎዎ ዎዳይ ሄኮ ሃሩ! አቴላ ጋላሲካ ሃሩኮ! *

3 ኑ ኦሶይ ለቄቶንታ ማላ አይ ዎዳካ ኦናሰካ ኑኒ ቆጶ ጊዶኮ። 4 ሃሳፌ አሊዲ ዎዴኔ ሜቶ ኡንዎካ ዳንዳያን ያሳሰ ኦሊዛ አሳታ ማላ አይ ኑኔራካ ኑናቴላ አሊ አሞስ። 5 ኑኒ ያሳሰ ኦሊዛይታ ጊዳዳይሳ ቤሲዛይ ጋራፊቴላን፣ ቃሼቴላን፣ ሂርጋን፣ ዳቡሪ ኦሶን፣ ጳሲኮ ቆዮኒኔ ጋፋና። * 6 ሃሳላካ ጊሻቴላን፣ ኤራቴላን፣ ዳንዳያን፣ ኪያቴላን፣ ዲሎ አያና ካሎኒኔ ቆጶፔ ቆሞን ጊዳንታ ሰቆን፣ 7 ቱማ ቃላኒኔ ያሳ ዎልቃና። ኑ ኢዛን ጌዴ ኦሊ ያኒዛ ኦላ ሚሺኔ ካማቲ አቴዛ ጎንዳሌይ ዲሎቴላ። 8 ቦንቸሰ ጊዳን ዎይኮ ካወሻስ፣ ቆጶታናሰ ዎይኮ ጋላታናሰ ኑኒ ጊኔቴዳይታ። ኑኒ ቱማንቻታ ሺን አሴ ባሌሊዛይታ ጌቴቴዳስ። 9 ኑኒ ኤራቴዳይታ ሺን ኤራቴንታይታ ጊዳዳዳስ። ኢሰቲ ሃይቁዳይታኮ ጊሺን ኑኒ ፓፃ ደስ። አሳይ ኑና ቡኪ ቡኪንካ ኑ ሃይቁቤኮ። 10 ሙዛይ ኑና ጋኪኮካ ኡባ ዎዳ ኡፋዬቶስ። ኑ ማንቆኮ ሺን ዳሮ ማንቆታ ዱሬ ኬሶስ። ኑስ አይኮይካ ባይንዳይታ ሺን ወሪካ ኑስ ዳስ።

11 ኢንቴኖ ቆርንቶሴን ዲዛይቶ! ታ ካሴ ኢንቴሰ ቆንጨን ዮታዲስ። ኑኒ ኑ ዎዝና ኢንቴና ወርሲ ቤሲዳስ። 12 ኢንቴ ቃሴ ኑና ኢንቴ ሲቆ ቤሳናሰ ኡዜቴዳታ አቴን ኑ ኢንቴና ኑ ሲቆ ቤሳናሰ ኡዜቴቤኮ። 13 አዎይ ባናሰ ዮቴዛ ማላ ታካ ኢንቴሰ አኔ ዮታይስ። ኑኒ ኑ ዎዝና ከሂ ደዩዲ ኑ ቆፋ ኢንቴሰ ቆንጨሲይሳላ ኢንቴካ ኑስ ሃሳላ ቆንጨሲቴ።

አማኖንታይታራ ዙፔቴላ አጎ

14 አማኖንታ አሳራ ጊጋይ ባይንዳ ኢሲፊቴላን አይኬቶፍቴ። ዲሎቴሊኔ ናጋራይ ዋኒ ኢሲፊቴታናሰ ዳንዳዩዜ? ፖዶይኔ ቆማይ ኢሲፊ ዋኒ ዳና ዳንዳዩዜ? 15 ኪርሰቶሴኔ ዳቡሎሲ ዋኒ ጋጋናሰ ዳንዳዩዜ? አማኒዛዳይ አማኖንታዳራ አዛን ላጌታናሰ

* 6:2 ኢሳ 49:8 * 6:5 ሃዋ 16:23

ዳንዳዪዜ? * 16 ያሳ ዋሳ ኬላስ ኤቃታራ ኣዛ ጋጎይ ዲዜ?
ያሲካ

“ታኒ ታ ዲሳሶ ታ ዳሬዛ ጊደን ኦላና፤

ታካ ኢስታራ ዳና፤

ኢስታሲካ ጎዳ ጊዳና።

ኢስቲካ ታ ዳሬታ ጊዳና” ጊዲ ካሴ ዮቲዳ ማላ ኑኒ ኢሶይ

ኢሶይ ዴዎ ያሳ ኬላታ። * 17 ጎዳይ

“ኢንቴ ኢስታ ጊዳፌ ሻኬቲዲ ኬዚቴ!

ቱና ሚሽ ሶቾፍቴ፤

ታካ ኢንቴና ኤካና። *

18 ታ ኢንቴስ ኣዋ ጊዳና፤

ኢንቴካ ታስ ኣቲማ ናይታኔ ማጫ ናይታ ጊዳንዴታ”

ጌስ ወርሲካ ዳንዳዪዛ ጎዳይ። *

7

1 ሄሳ ጊሽ ታ ሲቆቶ! ሃይሲ ሂዶታይ ኑስ ኢሚቲዳ ጊሽ
ኣሽኔ ኣያና ቱኒሲዛ ኣይ ሚሻፊካ ኣኔ ኑና ጌሾስ። ያሳስ ያሻን ኑ
ጌሻቴላ ኣኔ ኩሚላ ሂስቶስ።

ጳውሎሳ ኡፋይስ

2 ኢንቴ ኑና ኡፋይሳን ሞኪ ኤኪቴ። ኑኒ ኦናካ ቆሂቤኮ፤ ኦናካ
ናቁቤኮ፤ ኦና ጎዳካ ኑስ ባሌላ ኤኪቤኮ። 3 ታኒ ሄሳሉ ጊዛይ
ኢንቴ ቦላ ፒርዳናስ ጊዳና። ሃይሳፌ ካሴ ታ ኢንቴስ ዮቲዳ ማላ
ኢንቴ ኑ ዋዝናን ዴታ። ሄሳ ጊሽ ሃይቆንካ ጊዲን ፓፃንካ ኡባ ዋዴ
ኑ ኢንቴፌ ሻኬቶኮ። 4 ታስ ኢንቴ ቦላ ዲዛ ኣማኖይኔ ጨቁቴላ
ዳር ጊታ። ታ ኢንቴናን ሚኔታይስ። ኑና ጋኪዛ ሚቶ ኡባን ታኒ
ኬሃ ኡፋይታይስ።

5 ኑኒ ማቂድኒያ ጋኪዳ ዋዴካ ዳማ ዳማ ባጋራ ሚቶይ ኑና
ጋኪዴስ ኣቲን ኑኒ ኣይኮካ ሽምፖ ዴሚቤኮ። ኑስ ሶራ ሂርጋይ፣
ካሬራ ቃስ ኦሺ ዴስ። * 6 ጊዶ ኣቲን ሙዞቲዳይታ ሚንሌሊዛ
ጎዳይ ቲቶሳ ዩሳን ኑና ሚንሌሊዴስ። 7 ኑኒ ሚኔቲዳይ ኢዛ ዩሳን
ፃላላ ጊደንታ ዲሺን ኢንቴ ኢዛ ሚንሌሊዳይሳ ኑ ጉጂ ሲዩዳ

* 6:15 ዳቡሎሲ ገሪኬ ቃላራ “ቤልያል” ዋይኮ “ቤልያር” ጌቴቴስ፤ ኢብራዊታ
ቃላራ “ቤልያል” ጌቴቴስ። ቢሪሽቻይ ጎዳይ ባንዳይሳ [ኣይፌይ ባንዳይሳ] ዋይኮ
ዋጋይ ባንዳይሳ ጉሳ። * 6:16 1ቆር 3:16፤ 6:19 * 6:17 ኢሳ 52:11

* 6:18 2ሳሜ 7:14፤ 1ታር 17:13፤ ኢሳ 43:6፤ ኤር 31:9 * 7:5 2ቆር
2:13

ገሻሳ። እንቲ ታና ላሞቲዳይሳ ታስ ቃጂቲዛይሳ ቆፒዛይሳካ ኢዚ ኑስ የቲን ሲያዳ ታኒ ዳሮ ኡፋይታዲስ።

8 ታኒ ሃይሳፌ ካሴ እንቲስ ፃፊዳ ኪታይ እንቲና ሚሺሲዳ ገዲኮካ ሄ ኪታ ፃፊዳ ገሽ ታኒ ሄሳፉ ኣዛስ ፃፋዲና ጋዳ ሞጂቲኬ። ሞጂቲኮካ ታ ሞጂታናይ ጉፋ ሞዴስ እንቲ ታና ሚሺሲዳ ገሻሳ። 9 ሃዒ ገዲኮ ታ ኡፋይታይስ። ታኒ ኡፋይቲዳ ጋሶይ ታኒ እንቲና ሚቺሲዳ ገሽ ገደንታ እንቲ ሄ ሚሻፔ ዴንዲዳይሳን ማርቲፋን ጌሊዲ ላሜቲዳ ገሻሳ። ሄሳ ገሽ እንቲ ሚሹቲኮካ ፆሳ ሹኔ ማላ ገዲዳ ገሽ ኮኒ እንቲና ኣይኮካ ቆሂቤኮ ጉሳ። 10 ፆሳ ሹኔ ማላ ገዲዳ ሚሹቲሊ ጌዴ ማሬቲ ኣታናሶ ጋሌስ። ሄሳስካ ሞጂቲሊ ዴና፤ ሞዝናፔ ገደንታ ማሬቲላ ገዲኮ ሃይቆን ጋሌስ።

11 ሃይሲ እንቲ ሙዞቲላይ ፆሳ ሹኔ ማላ ገዲዳ ገሽ ሄሲ ኣይ ማላ ሚናቲፋን፣ ኣይ ማላ ኦይሻ ዛርን፣ ኣይ ማላ ኤሌ ሃንቁቲፋን፣ ኣይ ማላ ፆሻቲፋን፣ ኣይ ማላ ላሞቲፋን፣ ኣይ ማላ ሎፆ ኣሞን፣ ኣይ ማላ ሙራን እንቲና ጋሊደኮኔ ኣኔ እንቲ ሞዝናን ዩሺ ቆፒቲ። እንቲ ቃሴ ሃኒዳ ኡባንካ ሄ ሃናዛፔ ጌሽ ገዲዳይሳ ማርካሲዴታ። 12 ሄሳ ገሽ ታ እንቲስ ፃፊዳይሲ እንቲ ኑስ ኣይ ማላ ኣማኔቲዛይታኮኔ እንቲ እንቲና ፆሳ ሲንፋን ቤያና ማላፔ ኣቲን ቆሂዳዴ ገሺኔ ቆሂቲዳዴ ገሽ ጋዳ ገዴና። 13 ኮኒ ሚኔቲዳይሳፌ ቦላራ ቲቶሲ ዴሚዳ ኡፋይሳን ዳሮ ኡፋይቲደስ። ኮኒ ኡፋይቲዳይካ እንቲ ዉሪካ ቲቶሳ ሚንሌሊዳ ገሺኔ ኢዛ ሞዝና ሹምፒሲዳ ገሻሳ። 14 ታኒ እንቲናን ጨቁቲዛይሳ ካሴ ቲቶሳስ የታ ሞላዲስ። እንቲካ ታና ዬላሲቤይኬታ። ኡባ ሞዴ ታ እንቲስ ቱማ ፃላላ የታሹ ዳይስ። ሄሲካ ኮኒ እንቲ ገሽ ቲቶሳስ የቲዳ የፆይ ቱሙ ገዲ ኣማኔቲዴስ። 15 እንቲ ዉሪካ ኣዛዜቲዛይታ ገዲዳይሳ፣ ፆሻቲፋኒኔ ኮኮሪሹ እንቲ ኢዛ ሞኪ ኤኪዳይሳ ቲቶሲ ቆፒ ኤኪዲ ኢዚ እንቲና ሲቁዛይሳስ ዛሞይ ባሞ። 16 ታካ ኡባ ባጋራ እንቲናን ኣማኔታናሶ ዳንዳዴዳ ገሽ ታ ዳሮ ኡፋይታዲስ።

8

ማዶ ኣሞ

1 ታ ኣሻቶ! ፆሲ ማቂዲያን ዲዛ ኣማኒዛ ኣሳሰ እሚዳ ኪያቲላ እንቲ ኤራናይሳ ታ ኮያይስ። 2 ኢስቲ ዳሮ ሜቶቲ ዲሼ ዳሮ ኡፋይቲዳ። ኬሂ ማንቆታ ገዲኮካ ዳሮ ኪያቲዳ።

3 ኢስቲ ባሲ ዳንዳዬተዛይሳ ማላኔ ባሲ ዳንዳዬተዛይሳፊካ ኣሉ ኣሚዳይሳ ታ ኢስታ ጊሽ ማርካታይስ። 4 ቄሁዳን ዲዛ ኣማኒዛይታስ ማዶ ኣማናስ ዲጌቶንታ ማላ ኦና ኬሂ ዋሲዳ። 5 ኢስቲ ኦኒ ቆፒዳይሳፊ ቦላራ ኣሉ ኣሉዳ። ኢስቲ ኮይሮ ባና ጎዳስ ኣሚዳ። ዛርዲካ ፆሳ ሼኔ ማላ ባናካ ኦስ ኣሚዳ። 6 ሃይሳ ኦሶዛ ኮይሮ ቲቶሲ ዶሚዳ ጊሽ ሃዒካ ሃይሳ ማዶ ኣሞዛ ኢዚ ፖላና ማላ ኦ ኢዛ ዋሲዳስ። 7 ኣንቲ ኣማኖን፣ ሃሳያን፣ ኤራቴላን፣ ሚኖ ኦሶን፣ ኣንቲ ኦና ሲቂዛ ሲቆን፣ ኡባ ዮዖን ኣጼታ። ሃሳዮካ ኪያቴላ ኦሶንካ ኣጼዛይታ ጊዲቲ።

8 ታ ሃሳ ጊዛይ ኣንቲና ጮ ሚላ ኣዛዛናስ ጊዴና። ጊዶ ኣቲን ሃንኮ ሃራ ኣሳይ ሚኒ ኣሚዛይሳ ኣንቲናራ ጋላ ቤይሺን ኣንቲ ሲቆይ ቱሙ ጊዲዳይሳ ሻካ ኤሬናሳ። 9 ኣንቲ ኦ ጎዳ ዬሱስ ኪርሰቶሳ ኪያቴላ ኤሬታ።

10 ሃይሳ ሃ ሃኖዛን ታስ ሎዖ ጊዲ ቤቲዳ ዘሬ ታ ኣንቲስ ኣማይስ። ዘላይሉ ኣንቲ ኣሞ ፃላላ ጊዶንታ ዲሺን ኣማናስ ኮይሮፔ ቆፒዳይ ኣንቲና። 11 ሃሳ ጊሽ ኣንቲ ኣማናስ ኮይዳይሲ ፖሊታና ማላ ኣንቲስ ዲዛ ማላ ካሴ ኣንቲ ቆፒዳይሳ ሃዒ ኣሉቲ። 12 ኣሲ ኣማናስ ዋዘናፔ ኮይኮ ኢዛይይ ኪያቴላን ኣሚዛይሲ ኤኬቴዛይ ኣሲ ባሲ ዲዛሪ ማላ ኣሚኮ ኣቲን ባሲ ባይንዳይሳፊ ኣሚሺን ጊዴና።

13 ታ ሃይሳላ ጊዛይ ኣንቲ ዉሪካ ጊና ጊዳና ማላ ኣቲን ኣንቲ ኣሞን ዋይቲሺን ሃራቲ ሼምፓና ማላ ጋዳ ጊዴና። 14 ኣንቲ ዋይቲሺን ኢስታ ሚሻይ ኣንቲ ሜቶ ኣሻና ማላ ሃዒ ቃሴ ኣንቲ ሚሻይ ኢስታ ሜቶ ኣሾ። ሃሳ ማላን ኣንቲ ጊዶን ጊናቴሉ ዳና። 15 ሄሲካ “ዳሮ ሺሺዳዴስ ዋጲቤና፤ ጉሉ ሺሺዳዴሲካ ፓጪቤና” ጌቲቲ ጌሻ ማፃፋን ፃፊቲዳ ማላ። *

ቲቶሳኔ ሃንኮ ኢዛ ላጌታ

16 ታኒ ኣንቲስ ቆፒዛይሳ ማላ ቲቶሳይካ ኣንቲስ ዋዘናፔ ቆፓና ማላ ኣሉዳ ጎዳይ ጋላቴቶ። 17 ቲቶሲ ኣንቲኮ ቢዛይ ባርካ ባ ቆፋን ኡፋይሳንፔ ኣቲን ኦኒ ኢዛ ዋሲዳ ጊሽ ፃላላ ጊዴና። 18 ሚሺራቾ ቃላ ኦሶን ዋሳ ኬላታን ኡባን ዶሴቲዳ ኣሻዛ ኦ ኢዛራ ጋሉ ዬዶስ። 19 ሃሳፊካ ቦላራ ሃይሲ ኦ ኣሻይ ኦኒ ሃይሳ ሎዖ ኦሶዛ ጎዳ ቦንቾስ ኣሉሺኒኔ ኦኒ ኦላናስ ኮይዛይሳ ኢዛስ ቆንጨሲሺን ኢዚ ኦናራ ቢዲ ኦላናስ ዋሳ ኬላቲ ዶሪዳዴ።

* 8:15 ኬሳ 16:18

20 ሃይሳ ኪያቴል አሜቲዳ ሚሻዛ ኑኒ ኦይኪሺን ኑ ቦላ አይኮ ቦርይካ ጋኮንታ ማላ ኑኒ ናጌቶሰ። 21 ጋሰይካ ኑሰ ዋና ቆፋይ ጎዳ ሲንፋን ፃላላ ገደንታ አሳ ሲንፋንካ ሎዎ ኦፋናሳ። *

22 ዳር ዎዴ ዳር ሚሻን ፓጩቲዲ ሚኖ ገዲዳ ኑ አሻ ቲቶሳራ ኑ ኢዛ ዬዲዳይ ሃሳሳ። ኢዛሰ አንቴ ቦላ ዲዛ አማኖይ ዳር ገታ ገዲዳ ገሽ ኢዚ ሃዒ አንቴና ማዳናሰ ካሴፔ አሌ ኮዬሰ። 23 አንቴ ቲቶሳ ገሽ ኤራናሰ ኮይኮ ኢዚ አንቴና ማዳናሰ ታናራ ኦሊዛዴ። ኢዛራ ኢሲፌ ቢዛ ሃንኮ አሻቲ ቃሴ ዎሳ ኬፋቲ ባ ገሽ ዬዲዳ ኪርሰቶሳ ቦንቸሰ ኤቁዳይታ። 24 ሃሳ ገሽ አንቴ ኢሰታሰ አንቴ ሲቆ ቤሲቴ። አንቴ ሃሳፉ ሂሰቲኮ አንቴ ሲቆይኔ ኑ አንቴናን ጨቁቲዛ ጨቁቲፋይ ጮ ማላ ገደንታይሳ አንቴ ዎሳ ኬፋታሰ ቤሳንዴታ።

9

አማኒዛይታሰ ሚሽ ኬሶ

1 ዩሁዳን ዲዛ አማኒዛይታሰ ኬሲዛ ሚሻ ገሽ ታ አንቴሰ ፃፋናሰ ኮሼና። 2 አንቴሰ አካያን ዲዛ አሳሰ ማዳና ሎዎ ቆፋይ ዲዛይሳ ታ ኤራዳ “አካያ አሳይ ዘላይፋፌ ኦይኪዲ ማዶሰ ገሼቲዴሰ” ጋዳ ማቁደኒያ አሳሰ ዮታዲሰ። ሃራፔካ አንቴ ማዳናሰ ኮይዳ ሱሬ ቆፋይ ዳርታ ሎዎ ኦሶሰ ዴንፊሊዴሰ። 3 ሃይሳ ሃ ሃኖዛን ኑ አንቴናን ጨቁቲዛይሲ ጮ ማላ ገደንታ ማላ ሃይታ ኑ አሻታ ታ ኪታዲሰ። አንቴካ ታ ካሴ አንቴሰ ገዳ ማላ ናጌቲ ኡቲቴ።

4 ማቁደኒያ አሳቲ ታናራ አንቴኮ ቢሺን አንቴ ገሼቶንታ ዲዛይሳ ቤኮ ኑኒ አንቴናን ጨቁቲዛይሳን ዬላታና። አንቴ ቃሴ ዳር ዬላታና። 5 ሃሳ ገሽ አንቴ ካሴ አማና ገዲይሳ ካሴቲዲ ገሺሳና ማላ አንቴና ቆፊሳናሰ ጋዳ ሃይቲ አሻቲ ታፔ ካሴቲዲ አንቴኮ ጋካና ማላ ኮሺዛይሲ ታሰ ቤቲዴሰ። ሃሳፉካ ታኒ ቢዛ ዎዴ አንቴ አማናይሲ ገሺ ኡቲዳዝ ገዳና። አንቴካ አማናይሲ ዎልቃራ ገደንታ ዶሳን ገዲዳይሳ ቤሳና።

6 “ጉል ዜሪዳ አሲ ጉል ሽሻና፤ ዳር ዜሪዳይይ ቃሰ ዳር ካል ሽሻና” ገዛ ቃላ ዩሺ ቆፒቴ። 7 ያሲ ዶሲዛይ ባ ዶሳን አሚዛይ ገዲዳ ገሽ ኢሲ ኢሲ አሲ አማናሰ ባ ዎዝናን ቆፒዳር ኡፋይሳን አሞ ኣቲን ሞጴቲሼ ጮ ዎልቃራ አሞፎ። 8 ኡባ ዎዴ

* 8:21 ለም 3:4

ሃረዝ ኡባን ኢንቴ ኢንቴሰ ጊዲ ፓላሂዲ ሃራ ሎዎ ኦሶሰ ጊዳና ማላ ያሲ ኢንቴሰ ባ ኣንጅ ጉጂ ኢማናሰ ዳንዳዬሰ። 9 ሄሲካ

“ማንቆታሰ ኪያቴላን ኢሚዴሰ፤ ኢዛ ጂሎቴላ ማርናሰ ዴያና”

ጌቴቴ ጌሻ ማፃፋን ፃፊቴዳ ማላ። *

10 ዜሪዛዴሰ ዜሪላ፣ ማናሰ ካላ ኢሚዛ ጎዳይ ኢንቴ ዜሪዛ ዜሪላ ኢዚ ኬሂ ዳርሲ ኢማና። ኢዚ ኢንቴ ኪያቴላ ኦሶዛ ኣይፌ ኢንቴሰ ዳርሳና። * 11 ኢንቴ ኪያቴላን ኢሞይሲ ኑ ባጋራ ኢሰታ ጋኪዛ ኣሳቲ ያሴ ጋላታና ማላ ኢንቴ ኡባ ዎዴ ኪያቴላ ኢማና ማላ ያሲ ኢንቴና ኡባሶራ ዲሬሳና።

12 ሃይሲ ኢንቴ ኢሚዛ ኪያቴላ ኦሶይ ኣማኒዛይታ ማቶ ማዶፔ ቦላራ ኣሳይ ያሳ ዳርሲ ጋላታና ማላ ኦሎሰ። 13 ሃይሲ ኢንቴ ኪያቴላ ኦሶዚ ኢንቴ ኪርሰቶሳ ሚሺራቾ ቃላን ኣማኒዲ ኣማኔቲዳይታ ጊዲዳይሳ፣ ኢሰታሲኔ ሃራታሰካ ኢንቴ ኪያቴላ ኢሚዳይሳ ኤሪሲዛዝ ጊዲዳ ጊሽ ኢሰቲ ዉሪካ ያሴ ጋላታና።

14 ኢሰቲ ቃሴ ያሲ ኢንቴሰ ኢሚዳ ጊታ ኪያቴላ ጌዶን ኢንቴና ሲቁዝ ጊሽ ኢንቴሰ ዎሳና። 15 ኣሳ ቃላን ቆንጨሴላፌ ቦላ ጊዲዳ ያሳ ኢሞቴላ ጊሽ ያሲ ጋላቴቶ።

10

ጳውሎሲ ባ ኦሶ ጊሽ ኢሚዳ ቆፋ

1 ታ ጳውሎሲ ኢንቴናራ ዲሺን ኢዚ ኣሺኬ ጌቴታዲሰ ሺን ታ ኢንቴፌ ሃኪሺን ቃሰ ኢንቴ ቦላ ፃሊዳዴ ጌቴቲዳ ታ ጳውሎሲ ኪርሰቶሳ ኣሽኩቴላኒኔ ኢዛ ሎዴቴላን ኢንቴና ዎሳይሰ። 2 ታኒ ኢንቴና ዎሲዛይ ታ ኢንቴኮ ሄ ቢዛ ዎዴ ኢንቴ ታና ፃላቴላን ሃሳዪሶንታ ኣጋና ማላ። ኑኒ ኣሾ ቆፋን ሲሜሪቲዛ ማላ ኑና ጃሊዛ ኢሲ ኢሲ ኣሳታ ሲንላን ታኒ ፃላቴላን ሃሳያናሰ ኮያይሰ። 3 ኑኒ ዲዛይ ሃይሳ ኣላሜዛ ቦላ ጊዲኮካ ኑ ኦሎቲዛይ ሃ ኣላሜዛ ኣሳ ኦላ ማላ ጊዴና። 4 ኑ ኦላ ሚሻይካ ኦላ ሚፃ ላላናሰ ዳንዳዪዛ ያሳ ዎላቃይ ዲዛይሳ ኣቲን ሃይሳ ኣላሜዛ ኦላ ቶራ ጊዴና። 5 ያሴ ኤርንታ ማላ ቆጶ ጊዲ ዴንዲዛ ፓላማኔ ኦቶሬቴላ ኑ ላሎሰ። ኣሳ ቆፋ ዉርሲ ዲዒ ኤኪዲ ኪርሰቶሳሰ ኣዛዜታና ማላ ኦሎሰ። 6 ኢንቴ ኣዛዜቴላ ፖሎቲዛ ዎዴ ኣዛዜቶንታ ኣይ ሚሾካ ቃፃያናሰ ኑኒ ጊጌቲ ኡቴዶሰ።

* 9:9 ማዛ 112:9 * 9:10 ኢሳ 55:10

7 እንገባ ያለዚህ ካሬ ባጋራ ቤተሰብ 9ላላ። ኦሪካ ታኒ ከርሰቶሳሰኩ ገደብ አማኝቲኩ ዛሬሌ ቆገ። ኦካ ኢዛ ማላካ ከርሰቶሳይታ ገደብ ደረሰ ኢዛይይ ዋዘናን ዋ። 8 ጎዳይ ኩሰ አሚዳ ማታ ገሽ ታኒ ኢዛን ጨቁኮካ ዩላቲኬ። ሄሲ ማታይ ታሰ አሚቲዳይ ኦኒ እንገባ ሚሲሳናሰ አቲን ላላናሰ ገደብ። 9 ታኒ ሃ ከታን እንገባና ባቢሶሰ ኦሌዛ ሚሳቶፖ። 10 ኦኒ ኤሪዛይ ኢሲ ኢሲ አሳቲ “ጳውሎሳ ከታቲ ዳዖኔ ዋለቃማ፤ ገደ አቲን ኢዛ ኦ አቻን ዲዛ ዋዳ ኢዛ ላፋ፤ ኢዛ ሃሳያይካ ለቁቲዳዛኮ!” ገዛዚ ገደብ። 11 ሃሳ ገዛ አሳቲ ኦኒ ሃሆን ዲሼ 9ፊ ከቲዳይሳሰኔ ቃሰ እንገባናራ ዲሼ ኦ ኦሌዛይሳ ገደን አይኮ ዲማቴሌ ባይንዳይሳ ሻኪ ኤሬቶ።

12 ገደብካ ባርካ ባና ናሽዛ ኢሲ ኢሲ አሳታራ ኦና ኦርካ ጋሌ ያላናሰ ዋይኮ ኢሰታራ ኦና ገረሳናሰ 9ሎኮ። ኢሰቲ ቃሴ ባርካ ባና ባናራ ጋሌ ያለዚ ገሽ ኢሰቲ ዩሽ ቆገዛይታ ገደብ። 13 ኦ ቃሴ እንገባ ጋካና ጋካናሰ ያሲ ኩሰ አሚዳ ኦሶ ዛዋን ሲሚሬቶሰ አቲን ዋጋፔ አሌ ጨቁቲዛይታ ገደብ። 14 እንገባ ቃሴ ኦ ኦሌዛሶን ዲዛ ገሽ ከርሰቶሳ ሚሽራቾ ቃላ ታማርሳናሰ ኦ እንገባኮ ቢዳ ዋዳ ኦኒ ሄ ኦ ዛዋፔ አጁቤኮ። 15 ሃሳ ገሽ ያሲ ኩሰ አሚዳ ዛዋፔ አጁ ያራ አሳታ ኦሶን ጌሊዲ ዋጋፔ አጁ ጨቁቶኮ። ሃሳፌ ቦላራ እንገባ አማኖይ ዲጫና ማላኔ ኦ ኦሶይካ ያሲ ኩሰ አሚዳ ዛዋን እንገባ ገደን አካናይሳ ናጎን ደሰ። 16 ሃሳ ገሽ ኦ ሃራ ኢሲ ኦሌዛ ዛዋ አጁ ካሴቲዲ ኦሌቲዳ ኦሶን ጨቁቶንታ ዲሼ እንገባ ሄኒን ዲዛ ዳሬታሰ ሚሽራቾ ቃላ ዮታናሰ ዲንዳዮሰ።

17 ገደ አቲን ያሳ ማፃፋይ “ጨቁቲዛ አሲ ጎዳን ጨቁቶ” ገደብ። * 18 አሲ ጋላቲታናሰ ዳንዳዩዛይ ጎዳይ ጋላቲኮ አቲን ባርካ ባና ጋላቲን ገደብ።

11

ጳውሎሳኔ ዋርዶ ሃዋሬታ

1 ታ ጉላ ኤያቲላ እንገባ ዳንዳያና ማላ ታ ሂዶታ ኦላይሳ ሃያና ዳንዳዩቲ። 2 ኢሲ ጌሎንታ ጌሻ ጌላያያ ባ ጌላያቲላን ኢሲ አዚናሰ ገረዛ ማላ ታካ እንገባ ከርሰቶሳሰ ገረሲዳ ገሽ ታ እንገባ ገሽ ሎዖ ቆፋ ቆጋይሰ። 3 ሾሻይ ባ ጌኔራ ሄዋኖ ባሌዲይሳላ ኦኒ ኤሪዛይ እንገባ ቆፋይካ ሞሬቲን ከርሰቶሳሰ ዲዛ ሱሬኔ

* 10:17 ኤር 9:24

ገሽ ጊዲዳ አማኔቴላ አንቴና አጋጋንዳቶ ጋዳ ታ ሂርጋይሰ። *
 4 ኢሲ አሲ አንቴኮ ዩዲ ኑ ካሴ አንቴሰ ሳባኪዳይሳ ገደንታ ሃራ ዩሱሳ ሳባኪኮ ዋይኮ ካሴ ኤኪዳ ኣያና ገደንታ ሃራ ኣያና ኤኪኮ ዋይኮ ካሴ አንቴ ኤኪዳ ሚሺራቾ ቃላ ገደንታ ሃራ ሚሺራቾ ቃላ ኤኪኮ ጮ ማላ አንቴ ያኔቲዳታ ጉሳ።

5 ገዲኮካ ታኒ ሃይታ ገታ ሃዋሬታፔ ኣይኮንካ ጉዲዛ ታሰ ሚሳቴና። 6 ሃሳያን ጨንጫ ገደንታ ኣገኮካ ታሰ ኤራይ ፓጠቤና። ሄሳ ኑኒ አንቴሰ ዲማ ዲማ ኦጌራ ቆንጩን ኤርሲዶሰ።

7 ታኒ አንቴሰ ያሳ ሚሺራቾ ቃላ ዳዋዛይ ባይንዳ ሳባኪዳይኔ አንቴና ቆቁ ሂሰታናሰ ታኒ ታና ካዉሺዳይሲ ኦኔ ኤሪዛይ ታሰ ናጋራ ገዲ ቆዴቲዳሻ? 8 አንቴሰ ኦላናሰ ሃንኮ ዋሳ ኬላታፔ ታኒ ማዶ ኤኪዳይሲ ኢሰታፌ ሺሻ ኤካዳኮ። 9 ታኒ አንቴናራ ዲሺን ታና ማቲን ማቂደኒያፔ ዩዳ ኢሻቲ ታሰ ኮሺዛዛን ታና ማዲዳ ገሽ ኦናሰካ ቶሆ ገዳቤኬ። ሃኖ ጋካናሰካ ኣይ ሚሻንካ አንቴሰ ቶሆ ገዳቤኬ። ሲንላፊካ ታ አንቴሰ ቶሆ ገዲኬ። *

10 ኪርሰቶሳ ቱማቴሊ ታናን ዲዛ ገሽ ታኒ ጩቁቶንታ ማላ ታና ዲገዛይ ኣካያ ዴሬን ኦኒካ ባዋ። 11 ሄሳሰ ጋሶይ ኣዜ? ታኒ አንቴና ሲቆንታ ገሺ? ታ አንቴና ሲቁዛይሳ ያሲ ኤሬሰ።

12 ሄይቲ ዋርዶ ሃዋሬቲ “ኑካ ኢሰታሶ ኦላሰ” ገሺ ኢሰቲ ጩቁቲዛይሳ ዲጋናሰ ታ ሃዒ ኦሊዛይሳሶ ሲንላፊካ ኦላና። 13 ሄይታንታ ማላ ኣሳቲ ኪርሰቶሳ ሃዋሬታ ሚሳታናሰ ባርካ ባና ለሚዛ ዋርዳንቻ ሃዋሬታኔ ባሌሊዛ ኦሳንቻታ። 14 ሄሲካ ዳር ማላሊሲዛዚ ገዳና። ፃላዔይካ ባና ፖ? ኪታንቻ ሚሳቲሲዲ ለሚቴሰ። 15 ሄሳ ገሽ ሄይቲ ፃላዔ ኦሳንቻቲ ሃንኮ ዪሎ ኦሳንቻታ ሚሳታናሰ ባርካ ባናቴላ ለሚኮ ኣይኮካ ማላሊሴና። ወርሴላን ኢሰቲ ባ ኦሶ ዋጋ ኤካና።

ጳውሎሲ ሃዋሬቲላ ገደን ቤዩዳ ዋዩ

16 ኦናሰካ ታኒ ኤያ ገዲዳዚ ሚሳቶፖ ጋዳ ቃሶካ ዮታዲሰ። ታ ኢሰታሰ ኤያ ሚሳቲኮካ ጉላ ዋዴሰ ታ ጩቁታና ማላ ታና አንቴ ኤያ ማላ ቆዲቴ። 17 ታኒ ሄሳሶ ዱና ኩንላ ሃሳዩዛይ ጎዳ ሽኔ ማላ ገደንታ ኤያ ኣሳ ማላ ገዳዳ። 18 ዳርቲ ባ ኣሾ ቆፋን ጩቁቲዛይሳሶ ታካ ጩቁታና። 19 አንቴ ቃሰ ዩሺ ቆፒዛይታ ገዲዳ ማላ ሃንኮ ኤያታ ኡፋይሳናሰ ዳንዳዬታ። 20 ሄሳሶካ ኦኒካ

* 11:3 ሜጲ 3:1-5:13 * 11:9 ፒሊ 4:15-18

አንድና ባሲ አይሌሰኮኔ ኦኒካ አንድና ቦንቁኮ፣ ኦኒካ አንድናን ጎዔቲኮ፣ ኦኒካ አንድና ሌቁኮ፣ ኦኒካ አንድሰ ሻጋላን ባቁኮ አንድ ዳንዳዬታ። 21 ኢዚ ታና ዩላሲዛዚ ጊዲኮካ ሃይታ ሃ ሃናታ ኦላናሰ ኮኒ ሚኖ ጊደንታይሳ ታኒ አንድሰ ቆንጨሳይሰ።

ጊደ አቲን ኦኒካ ጨቁታናሰ ፃሊኮ ታካ ኢዛላ ፃላዳ ጨቁታና። ታኒ ሄሳ ጊዛይ ሃዒካ ኤያ ጊዳዳ። 22 ሄይታንቲ ኢሰቲ ኢብራቁ አሳቴ? ታካ ኢብራቁኮ! ኢሰቲ ኢሰራዔሌ አሳቴ? ታካ ኢሰራዔሌ አሳኮ! ኢሰቲ ኢብራሃሜ ዜሬላቴ? ታካ ኢብራሃሜ ዜሬሊኮ! 23 ሄይታንቲ ኪርሰቶሳ ኦሳንቻቴ? ታኒ ቃሰ ኢሰታፌ ቦላራ ኪርሰቶሳሰ ኦሊዛዳ። ታ ሄሳላ ጊዛይ ጎሻ ማላ ጊዳዳኮ! ታኒ ኢሰታፌ ዳሮ ዎዴ ኦሶን ዳቡራዲሰ፤ ዳሮ ዎዴ ቃሽታዲሰ፤ ዳሮ ዎዴ ጋራፌታዲሰ፤ ዳሮ ዎዴ ሃይቆሰ ጋካዲሰ። *

24 ሄሹ ታማኔ ኡዱፋን ፀርቃፌ ኢቻሹቶ አይሁዳታን ጋራፌታዲሰ። * 25 ሄሹቶ ዱርቃን ቡኬታዲሰ፤ ኢሲቶ ሹቻን ጫዳታዲሰ፤ ሄሹቶ ማርካቤ ጊደን ታ ቦላ ሜቶይ ጋኪዳሰ፤ ኢሲ ኦማርሲኔ ኢሲ ጋላሰ አባ ጊደን ጋሞዒዲሰ። * 26 ታ ሃሙላ ዳሮ ጋሶን ሃላ ከፃይኔ ዲያይ፣ ፓንጋታፔ ሜቶይ ታና ጋኪዳሰ። ታ ቆሞ አይሁዳ አሳቴኔ አይዛቤታፔ ዎዬይኔ ሜቶይ ታና ጋኪዳሰ። ካታማንካ ባዞንካ አባ ቦላንካ ታና ሜቶይ ጋኪዳሰ፤ ሄሳላካ ዎርዶ አማኒዛይታፔ ሜቶይ ታና ጋኪዳሰ። * 27 ዳሮ ኦላ ዳቡራዲሰ፤ ዳሮ ዎዴ ጳሰካቤኬ፤ ጋፋኒኔ ሃላ ሳሞን ዎዬታዲሰ፤ ዳሮ ዎዴ ሚዛ ካሊ ታሰ ጳዪዳሰ፣ ሜጎይኔ ካሎቴላ ታና ጋኪዳሰ። 28 ታኒ ሃራ ሚሺ ቆፖንታ፣ ጋላሰ ጋላሰ ታና ቆፒሲዛይ ዎሳ ኬላታ ኡባ ጊሽ ቆፒዛ ቆፋ። 29 ኢሲ አሲ ዳቡሪሺን ታኒ ኢዛራ ዳቡሮንታ አይዳ አጋዲና? ኢሲ አሲ ናጋራን ኩንዲሺን ታ ቃሴ ኢዛ ሃንቁቶንታ አይዳ አጳ ኤራዚና?

30 ጨቁታናሰ ኮሺዛዚ ጊዲኮ ታ ጨቁታናይ ታ ዳቡራንቻ ጊዲዳይሳ ታና ቤሲዛ ሚሻን ጨቁታይሰ። 31 ሚርናሰ ጋላቴቲዳ ጎዳ ዩሱሰ ኪርሰቶሳ አዎ ያሲ ታ ዎርዶቶንታይሳ ኤሬሰ። 32 ታኒ ዳማሰቆ ካታማን ዲሺን ካዎ አርሲያሲዮሳፔ ጋርሳራ ዳሬ አይሲዛይሲ ታና ኦይካናሰ ኮይዲ ሄ ካታማ ፔንጌታ ዛቤታን ናጊሲዳሰ። 33 ጊዲኮካ አሳይ ታና ኬሼን ዩጊዲ ሄ ካታማ ጊንቤ ማሰኮቴራ ዱጌ ዎሊ ዩዲን ኬሳ ኤካ አታዲሰ።

* 11:23 ሃዎ 16:23 * 11:24 ዛሬ 25:3 * 11:25 ሃዎ 14:19፤ 16:22 * 11:26 ሃዎ 9:23፤ 14:15

12

ጳውሎሲ ቤዩዳ አጅታ

1 ጩቄቴላን አይኔ ጎዳይ ባይንዳ አገኮካ ጩቄታናስ ኮሺኮ ጎዳይ ታስ ቆንጨሲ አሚዳይሳኒኔ ኢዚ ቤሲዳ አጅታን ታ ጩቄታና። 2 ከርስቶሳስ ጊዲዳ አሳዳ ታ ኤራይስ። ሄ አዳዚ ታማኔ አይዲ ላይላፌ ካሴ ሄቫንሶ ሳሎ ኤኬቲ ቢዳስ። (ኢዚ ኤኬቲዳይ ባ አሾራ ጊዲን ወይኮ አሾራ ጊደንታ ኣገን ኤሪኬ ሺን ያሲ ቃሴ ኤሪስ።)

3 ጊዲኮካ ኢዚ ባ አሾዛራ ቢን ወይኮ ማላ ቢን ታ ኤሪኬ። ያሲ ቃሴ ኤሪስ። 4 ኢዛይይካ ፑዴ ጋናቲ ኤኬቲዲ አሳ ቃላን ቆንጨሳናሲኔ ኣሲ ጋናስ ዳንዳዮንታዝ ኢዚ ሲይዳስ። 5 ታኒ ሄሳ ማላ አሳን ጩቄታይስ። ታ ሁዔስ ጊዲኮ ታ ዳቡርሳፌ ሃራ ታ ኢዛን ጩቄታና ሚሺ ታስ ዳና። 6 ሂሳቲን ታኒ ቱማ ሃሳዩዛ ገሽ ጩቄታናስ ኮዩኮካ ታ ኤያ ጊዲኬ። ጊደ አቲን ኦኒካ ታ ቦላ ባ ቤዩዛዛፔኔ ታፔ ሲዩዛይሳፌ ቦላራ ቆፖንታ ማላ ጋዳ ጩቄታናፔ ናጌታይስ።

7 ሃይታ ታስ ቆንጨዳ ጌታ ሃኖታ ጋሶን ታኒ ኦቶሬቶንታ ማላ ታ አሳቴላ አጉንሳ ማላ ጫዲዛ ሳኮይ ታስ አሚቲዳስ። ሄሲካ ዓላዔፔ ከቲቲዲ ታና ጫቻን ወይሲዲ ታ ጩቄቶንታ ማላ ዲጌስ።

8 ሃይሲ ታና ወይሲዛይሲ ታፔ ከቻና ማላ ታኒ ጎዳ ሄቭቶ ዋሳዲስ። 9 ጊደ አቲን ጎዳይ ቃሴ “ታ ዋልቃይ ኩሚላ ጊዲ ቆንጨናይ ኔ ዳቡርሳን ጊዲዳ ገሽ ታ ኪያቴላ ኔስ ጊዳና” ጊዳስ። ሄሳ ገሽ ከርስቶሳ ዋልቃይ ታ ቦላ ጊዳና ማላ አይ ዋዴፔካ ቦላራ ታኒ ዳቡርሺን ሄ ዋዴ ኡፋይሳን ጩቄታናስ ደሳይስ። 10 ታኒ ዋልቃ ዳሚዛይ ዳቡሪዛ ዋዴ ጊዲዳ ገሽ ታ ከርስቶሳ ገሽ ዳቡሪሺን፣ ጫዬቲሺን፣ ማቶቲሺን፣ ጎዳቲሺን፣ ሙዞቲሺን ታና ኡፋይሴስ።

ቆሮንቶሴ አሳ ገሽ ጳውሎሳ ቆፋ

11 ታኒ ኤያ አሳ ማላ ሃሳያዲስ! ታኒ ሄሳላ ሃሳያና ማላ ኦሊዳይ አንቴናኮ! አንቴ ታና ጋላታናስ ቤሴሲኮ ሺን ታ ኦናኮኔ ኤራቶንታይ ጊዲኮካ ሃንኮ ጌታ ጌቲቲዳ ሃዋሬታፔ ታኒ ኣዛንካ ጉዩክ። 12 ታኒ ቱሙ ሃዋሬ ጊዲዳይሳ ኤሪሲዛ ሃኖቲ ታ አንቴናራ ዳሼ ዳንዳያን ፖሊዳ ኦሶታ። ሄይቲካ ማላታታ፣ ጌታ ኦራላ ሚሺታኔ ማላሊሲዛ ኦሶታ። 13 ታኒ አንቴሰ ቶሆ ጊደንታ አጎሪፔ አቲን ሃንኮ ሃራ ዋሳ ኬሳታፔ አንቴና ኣዛን ፓጨሳዲና? ሄሲካ ሞሮ ጊዲኮ አንቴ ታና ማሪቴ።

14 ታኒ ሄ እንገድረ ሳናሰ ገቢቲሺን ሃይሲ ሃሻንጾ። ታኒ እንገድረ ቶሆ ገዳናሰ ኮዪኬ። ታኒ እንገድረ ኮያይሰ ኣቲን እንገድረ ሚሻ ኮዪኬ። ኣዋቲ ናይታሰ ሚሻ ሺሹቴሰ ኣቲን ናይቲ ኣዋታሰ ሚሻ ሺሺ ኤሬቴና። 15 ታኒ እንገድረ ገሽ ታናካ ታሰ ዲዛዝ ወርሳ እንገድረ ኣላ እሚዳኮ ታና ዳሮ ኡፋይሴሰ። ሂሰቲን ታኒ እንገድረ ሃይሳ ማላ ዳሮ ሰቂሺን እንገድረ ቃሰ ታና ዋኒ ጉላራ ሰቂቲ?

16 ኣይ ገዲኮካ ታ እንገድረ ቶሆ ገዳቤኬ ሺን እንገድረ ታ እንገድረ ጮ ጌኔን ባሌላ ኦይኪዲዚ ሚሳቴሰ። 17 ታ እንገድረ ኪታ ዬዲዳ ኣሳታፔ ኣሳይ ባጋራካ እንገድረ ጎዔታዲና? 18 ቲቶሲ እንገድረ ሳና ማላ ታ ኢዛ ዋሳዲሰ። ሄሳ ኦ እሻዛካ ኢዛራ ጋላ ዬዳዲሰ። ሂሰቲን ቲቶሲ እንገድረ ኣይኮ ጎዔቲዳ? ታኒኔ ኢዚ እንገድረ ኦሊዳይ ኢሲ ዋዝናን ገዳኔ? ካሴ ኦ ሃናይ ኢሲ ማላ ገዳኔ?

19 እንገድረ ወሪካ ሃዒ ጋካናሰ ቆፒዛይ ኦ እንገድረ ሲንላን ኦና ኣሻናሰ ሃኒዛ ሚሻ ማላ ጸሌቲ? ኦኒ ኪርሰቶሳን ገዲዲ እንገድረ ዮቲዛይሲ ጸሳ ሲንላና። ታ ሲቆቶ! ኦ ሃይሳ ወርሲ ዮቲዛይ እንገድረ ጎሳናሰ ገዲኮ! 20 ታኒ ሄ ቢዛ ዋይ ኦኔ ኤሪዛይ እንገድረ ታ ኮይዳ ማላ ሃናንታ ኣገኮ ታካ እንገድረ ኮዪዛ ማላ ገደንታ ዳሼ ጋጌታኔሻ ጋዳ ሂርጋይሰ። ሄሳላካ እንገድረ ገደን ኦሺ። ቃናቴቴላ፣ ሃንቆይ፣ ዙፔቴላ፣ ኣሳ ሱንላ ኢሶይ፣ ዚገርሲ፣ ኦቶሪቴላኔ ካቺ ዲሰ ኣጌና ጋዳ ሂርጋይሰ። 21 ታኒ ቃሴካ ሄ እንገድረ ቢሺን ኦኔ ኤሪዛይ ታ ጎዳይ ታና እንገድረ ሲንላን ካወሻንዳ ጋዳ ሂርጋይሰ። ሃይሳፊ ካሴ ናጋራ ኦሊዲ ሄ ኦሊዲ ቲናቴላን፣ ላይማኒኔ ጮ ማላ ዬዳ ዲሳሰ ማርቴላን ጌሎንታ ኣሳታ ጋሶን ታ ሙዙቴላን ዋቆንዲና ጋዳ ሂርጋይሰ።

13

ወርሴላ ዞሬኔ ሳርካ

1 ሂሰቲኮ ታኒ እንገድረ ቢሺን ሃይሲ ታሰ ሃሻንጾ። ኣይዳካ ገዲን ዮያይ ሚኒዛይ ናምዑ ማርካን ዋይኮ ሃሻ ማርካና። *
 2 እንገድረ ቤያናሰ ታ ናምዓንጾ ቦይሳን ታ እንገድረ ዳሼ እንገድረ ናጌታና ማላ ታ እንገድረ ሚንላ ዮታዲሰኮሺን፤ ሃዒካ ቃሴ ሃሆን ዳዳ ሃይሳፊ ካሴ ናጋራ ኦሊዲይታሲኔ ሃንኮይታሰ ሚንላ ዮታይሰ። ሃዒ ታ እንገድረ ሄ ሰማ ቢኮ ኢሰታፊ ኦናሰካ ሚሹቴኩ። 3 ሄሲካ ቃሴ ታናን ገዲዲ እንገድረ ዮቲዛይ ኪርሰቶሳ ገዲዲይሳ እንገድረ

* 13:1 ዛሬ 17:6፤ 19:15

ሻኪ ኤራናሰ ኮዪዛይሳ ቤሴሰ። አንቴ አቻን ዲዛ ኪርሰቶሲ ዋልቃማ ኣቲን ላፋ ጊዳና። 4 ኢዚ ማሰቃሌ ቦላ ካቁቲዲ ደቡራን ሃይቁኮካ ሃዒ ቃስ ያሳ ዋልቃን ፓፃ ዴሰ። ኑካ ኢዛራ ላፋታ ጊዲኮካ አንቴ ጊሽ ጊዲ ያሳ ዋልቃን ሚኒ ደሰ።

5 አንቴ ኣማኖን ሚኒ ዲዛኮኔ ኤራናሰ ኣኔ አንቴርካ አንቴና ፓጪ ያለቲ። ዬሱሰ ኪርሰቶሲ አንቴናን ዲዛይሳ ሻኪ ኤሪቤይኬቲ? ሄሳሶ ሃኖንታ ኣጊኮ አንቴ ፓጩን ኩንዲዴታ ፕሳ። 6 ኑኒ ፓጩን ኩንድንታይሳ አንቴ ሻኪ ኤራና ጋዳ ሂዶታ ኦላይሰ። 7 አንቴ ኢታ ሚሺ ኦሶንታ ማላ ኑኒ ያሴ ዋሶሰ። ኑኒ ዋሲዛይካ ኑ ኣይኮካ ደንዳዪዛይታ ጊደንታ ኣጊኮካ አንቴ ኡባ ዋዴ ሎፆ ኦሶ ኦላናፔ ኣቲን ኑ ጎባቴሌ አንቴና ቤሳናሰ ጊዳና። 8 ኑኒ ቱማቴላሰ ኦሶሰ ኣቲን ቱማፔ ካሬራ ኣይኮካ ኦላና ደንዳዮኮ። 9 ኑኒ ደቡራንቻታ ጊዲን አንቴ ቃስ ሚኖታ ጊዲሺን ኑና ኡፋይሴሰ። ኑ ዋሳይ አንቴ ቦላ ዋሶይ ባይንዳይታ ጊዳና ማላሳ። 10 ታኒ ሃይሳ አንቴሰ ዬዲዛ ኪታዛ አንቴፊ ሃካ ዳሼ ፃፊዳይ ሄሳ ጊሻሳ። ሄሳ ማላን ታ አንቴኮ ቢዛ ዋዴ ታሰ ጎዳይ ኢሚዳ ኣዋቴላን ታ አንቴና ዋይሲኬ። ጎዳይ ታሰ ኣዋቴላ ኢሚዳይ አንቴና ሚንላናሰ ኣቲን ላላናሰ ጊዳና።

11 ኣኔ ሃዒ ታ ኢሻቶ! ሳሮ ዲቲ፤ አንቴ ዲሳ ሎዔሌቲ፤ ታ አንቴና ዘሮይሳ ካለቲ፤ ኣሳይ ኢሶይ ኢሳራ ሰጌቲ። ሳሮን ዲቲ፤ ሰቆኔ ሳሮ ጎዳይ አንቴናራ ጊዳና። 12 ሰቆ ዬሬቴላ ዬሬቲዲ ኢሶይ ኢሳራ ሳሮኬቲ።

13 ኣማኒዛ ኣሳይ ዉሪካ አንቴና ሳሮ ጌሰ። 14 ጎዳ ዬሱሰ ኪርሰቶሳ ኪያቴሌ፤ ያሳ ሰቆይኔ ያሎ ኣያና ኢሲፊቴላ አንቴናራ ኡባታራ ጊደ።

ኦሪሳ ጩቆ ማፃፋ ንሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45